

# Penerima Anugerah Tokoh Maal Hijrah pertama negara

**Sheikh** Idris al-Marbawi dikenali sebagai seorang yang berfikiran jauh terutama dalam memikirkan nasib bangsa sendiri serta berusaha meningkatkan martabatnya menerusi penulisan.

Hal ini dapat dilihat menerusi pendahuluannya dalam Kamus Idris al-Marbawi yang bertulis 'Kemudian dari itu sebelum masuk mengarang ini, lebih dulu menerangkan maksud mengadakannya, ialah memajukan bangsaku Melayu. Oleh itu ku habiskan wujudku (hidupku) mentelaah kitab lughah (bahasa) Arab yang besar, cadangku ke bahasa Melayu

hendak ku kisar'.

Timbalan Pengarah (Penyelidikan dan Pembangunan) Akademi Pengajian Islam, Universiti Malaya Prof Madya Dr Mohd Roslan Mohd Nor berkata, Sheikh Idris al-Marbawi mempunyai keperibadian dihormati ramai kerana beliau tahu bagaimana memberi fokus dalam sesuatu perkara dilakukannya serta dibuat bersungguh.

"Malah, beliau juga berjaya membuktikan ulama tidak sekadar statik dengan sistem pengajian pondok saja, sebaliknya mencampurkan ilmu dan pengalamannya yang menuntut di luar negara dengan keadaan terkini.

"Kalau tiada sumbangan

ulama dulu, sukar untuk orang sekarang belajar agama, sebab itu kita kena ingat dan iktiraf peranan mereka ini,"katanya.

Menurutnya, bekas anak murid Tok Kenali yang pintar dan cepat faham pelajaran itu sering berpakaian

kemas dengan memakai jubah, serban, tongkat serta membawa payung.

Sheikh Idris al-Marbawi mendirikan rumah tangga dengan Che Khadijah Muhammad Edham berasal dari Kuala Kangsar pada 1923 dan berkahwin dengan isteri kedua, Munirah Abdul Wahhab serta dikurniakan seorang anak perempuan, Maryam.

Tokoh ulama dan pengarang ulung itu

dianugerahkan ijazah Doktor Kehormat Doktor Persuratan oleh Universiti Kebangsaan Malaysia pada 5 Julai 1980

dan menjadi penerima Anugerah Tokoh Maal Hijrah pertama negara pada 26 Ogos 1987.

Malah, Sekolah Melayu Lubuk Merbau ditukar nama kepada Sekolah Kebangsaan Syeikh Mohd Idris al-Marbawi, mengambil sempena nama beliau.

Allahyarham yang meninggal dunia pada pagi Jumaat 13 Oktober 1989 di Hospital Besar Ipoh dikebumikan di Tanah Perkuburan Islam Lubuk Merbau, Kuala Kangsar.